



今日は

Konnichiwa und Griezi

日本・スイス150周年

150 Joor Schwyz-Japan

E bolitisch Frintschaft diemer pfläage,
und das mit Japans Kaiser's sääge.
E roote Düpf zmittst iir Faane
lösst die uffgeend Sünne eraane.

Ängi Kooberazioone diemer fiere
uff diblomatischer Eebeni dischgeriere.
Vor vyyle Jòdre hämmers gschaft
noone Bùnd yzgoo, saagehaft.

Reege Handel het syy Aafang gnoo,
bròfydiere wèlle soo alli dervoo.
Öggonomisch, es isch dr Waan
nùmme ùffe wiene Zaanraadbaan.

Ze dääm Jubilääum im WeWeWee
kasch ganz vyyl Informazioone gsee.
E Loogoo wird gschwind greeiert
brangt scho uf dr Syte, ùnschiniert.

S' Handwäärgg het e Dradizioon,
jeedi Kùnscht en aige Innovazioon.
E weeneli rieme isch sèèr wichtig,
das beydruggt ys allewyyl richtig.

S'Spiilzyygwälte-Museum widmet dääm Theema
en Uusstèllig und bresendiert mit Scheema.
Boorzellaan, Kimono und Syydebänder,
informiert iiber Ditti in scheene Gwänder.

Scho syt iiber 150 Jòdr bigòscht,
gits au Teppanyaki-Kòscht.
D'japanisch Kùchi liigt im Trend,
s' Laufband bringt, was me nit kèndd.

D'Noofroog noo Sushi isch riisig,
mängem dúnggts nùmme gryyslig.
Raue Fisch, Mèèresfricht und wisse Ryys,
do derfiir blächscho noone rächte Bryys

Au Japaner spiile, wie kasch gsee
bim FCB e wichtig Ròlle immer mee.
Dr Kakitani kasch im Joggeli aafyyre
au är will Gool zum Gwinn bistyyre.